

IL GJAT DI BEAN

Cjâr pre Antoni,

cuant che tu scrivis di lenghe furlane, di culture furlane, di Vanzeli par furlàn, tu podis fâ rabiâ, ma bisugne scoltâti; barufâ magari, ma no fa fente di no cognossiti.

Si tu scrivis di pulitiche chei che come mê ti vuelin bèn a scugin diti: lasse cjapâ lis surîs dai gjàs.

Chiste volte don Carlo Rinaldi, a proposit di Gianni Presacco, al à vude resòn, anzit resonone, Gianni, e ancje a Gianni j vuei bèn, al ere diretôr di un Consei Pastorâl, e al si è metût in liste cui comuniscj. Si vevie di tasê?

Lassin stâ i partîs - ancje se come cristiâns e come furlâns, al sarà ben ch'a si discuti a lunc une buine volte su ce ch'a nus convèn fâ - ma chi si tratave di jessi di bande di puar padre Popielesku o, de bande dai siei sassins.

Ne tu, ne jô, ne Gianni Presacco podin stâ sentâs su dôs cjadreis.

Dût achî.

E pal rest amîs cun ducj, tal nòn de nestre mare lenghe e dal nestri Friûl.

Mandi

Feo di Beàn

Plui o voi indenant cui carnevâi e plui mi cunvinç che i democristians a son une rasse a part; cun tune logjche fûr di cualunche logjche ma che tal lôr cjâf e jè logjche. Si disarà che mi stoi inberdeant, ma il berdei plui grant lu fasin lôr. Par esenpli su la "politiche".

Dal '48 in ca dutis lis canonichis dal Friûl (no stin nancje a fevelâ po di chês da l'Italie) a erin une centrâl di propagande: seguitive, cunvinte e a gratis. E no dome lis canonichis, ma ancje lis azions catolichis, i confusionaris, i santuaris, i boletins e vie. Tocjave fâ politiche, par salvâ la civiltât. E se un nol ere tant ferbint o adiriture clip, al ere futût.

Podopo si à tacât a scelarî e a disseparâ lis dôs robis: la crôs di Crist a ere une robe e chê di Fanfani un'âtre. Dome che il partît al stave lant in vacje e alore si è tornâts al atac, in non de unitât ancje politiche dai cristians. Ma in chest fratinp, ben o mâl un cert pluralîsin al è jentrât ancje te glesie e alore e torne fûr la famose logiche. E àn dîrit e dovê di fevelâ ("Si vevial di tasê?") dome chêi ch'a disin di votâ DC. Chêi che no le pensin cussì, no àn di fâ politiche. O ben, e àn di fevelâ dome di "vanseli". Ma si puedial distacâ il vanseli dal onp e de storie, ch'al è il cjanp de politiche? Ch'al rispuidi lui cumò, onorevul.

No vuei jentrâ te cuistion di pari Popielesku (veramenti al sares Popieluszko). E jè une robe masse meschine doprâ un martar par dâj reson a di un predi che, in fat di prepotense, no savares cui sielgi tra lui e Jaruzelski.

Riguart 'e libertât, o pues dî che la vuestre no jè une buine scuele par chel cont. Parceche plui che fâ cressi la int, le veis conprade o ricatade. E cumò us sta voltant lis spalis. E tornarà parceche e à dibisugne dal puest, ma us e tornarà a petâ. E cun plene reson. Tal câs de autonomie furlane po, ch'al è chel

che mi sta plui a cûr, o scuèn dî, cun marum, che il partît ch'al à fat e ch'al fâs di mancul al è il vuestri, e che un Bressani nol à nuje ce inparâ di un missin. E la Mozion dal clero dal '67 cui le ajal fate lâ in vacje? No erial il dc Toros e compagnie? E lis senbleis dal '75 e '77, cui lis ajal combatudis di plui e cun ducj i sistemis? I democristians. Parceche vuâtris si ritignîs di vê un dirit espotic su la glesie. Vuâtris o podeis lâ cun cui ch'o voleis e fâ ce ch'o voleis ma la glesie 'e à di tignîus man, par cuistions "ideâls", ancje se i "ideâi" a van a finîle te croniche nere o in preson o sot dal armâr, tal grum.

Te mê speriense di predi, o ài cognossude tante int. Chêi che mi àn fat penâ di plui a son stâts propit i dc. Cun cheâtris amancul si tire il flât. Vuâtris o veis za la rispueste ancje a di cheste obiezion. "Ju provareis", o lais berlant a ogni votazion, par fâj pore 'e int. E alore us rispuint come che j à rispuintût une di pre Checo a di un giat che cumò al à la gjatàrie a Strasburc "Vuâtris us vin za provâts e an vin avonde!".

Par chel o cirarai, fin ch'o varai flât e fuarce, di stâ de bande des suriis (no ài mai vude la vocazion di gjat), e di judâlis a vuardâsi di ducj i gjaz. Ancje di chêi che, se ancje si platin daûr de crôs, si rive sinpri adore di lumâ un pâr di moschetutis.

Mandi e ogni sorte di ben.

Lui 1985

Antoni Beline